

# Fasnacht 2018



E ICE het in Basel drey Daag d Glais blockiert.  
Worum hänn mir jetzt uusegfunde und grad rapportiert:  
Dr Lokfierer het sich verfaare und isch nur entglait  
will är brav em Navi folgt, wo's: «Bitte wenden!» haisst.

«Messieursdames, nous allons jetzt uff Franggryych ynefaare.  
Avez-vous dr Passeport? Und hänn dr ebbe Waare?»  
Die neu Linie isch genial, das merggsch wenn s'Billje lösich:  
Jetzt mache mir's bim flotte 3er (Drämmli) au no uff französisch.

Basel het vyll alti Hüüser, das isch halt eso.  
Asbescht und Dächer wo sich sängge, deert muess ebbis goo.  
So Atlaschte hets überall, abstritte macht kai Sinn  
doch die gröschte Dachschräde hänn die im Roothuus inn.

Dr Donald Duck schreyt und tobt, är stampft voller Wuet.  
Si Gesicht wird rot und röter, jetzt lüpf'ts em grad dr Huet.  
Är isch so hässig, dass är alles Züüg duet ummeschmaisse:  
Är will wägem US-Trump(el) nimme Donald haisse.

Uff dr Autobahn gits neu im Shop jetz Alkohol  
Sit däm Entschaid isch's uns bim Faare gar nimm richtig wohl.  
Doch villicht isch Bier und Schnaps gar kai schlächte Plan:  
Eso gseesch dopplet so vyll Spuure uff dr Autobahn.

Am Samschdig kaufe mir als Schwyzer gärn in Lörrach yy.  
Drum däubele die Schwoobe deert, wänn unter sich nur syy.  
Mir finde das drnäbe - könne's nit verstoo:  
mir hänn sii schliesslig, gopfriedstutz, fünf Daag pro Wuche doo.

An dr «Wältklass Züri» traffe sich vyll Liichtathlete,  
sie seggle deert um d'Wett, sinn fascht so schnäll wie ne Rakete.  
Sie seggle nur im Kreis rundumme - ohni Sinn und Zwägg,  
egal wie schnäll du segglisch, so kunnsch nie vo Züri wägg.

Uff em Fänschterbangg isch plötzlig uns're Kaktus wägg.  
Und im Gaarte het's kai Gmies mee, iberall nur Drägg.  
Au kaini Bliemli und kai Ungrutt, au kai Leuezaan  
do sait mi Tochter: «Ibrigens – ych iss jetz neu vegan»

D'SBB goht aabe – mit dr Waage-Temperatur,  
sogar wenn's dusse yysig isch, do duure sinn si stur.  
Sie wänn uns so dängg früscher bhalte, will uns jetzte schyynne  
wenn ebbis länger hebe sott, machsch's au in Kielschrank yyne.

Dr Trump und dr Kim Jong-Un hänn beidi grossi Knöpf,  
wenn sie die drugge göön d'Rakete mit Atomsprängköpf.  
Jetzt stritte si wie Goofe, jede will dr Grösser ha.  
Drby, das weiss doch jedi Frau, kunnt's nur uff d'Technik aa.

Es het vyll z'wenig Huusärzt umme, das isch e Brobleem  
die junge Ärzt wänn nimm so schaffe, und sinn vyll z'bequem.  
Drum gang ich neu zum Tierarzt, dä ka das schliesslig au,  
denn mi Frau sait sowieso: «Benimmsch di wie ne Sau!»

Heugumper, Grille, Würmli ässe kasch jetzt offiziell.  
Das Ganze sinn mir noonig gwohnt, das isch sehr speziell.  
Do sait sich's Anni vo dr Metzger: «Do bin ich gar nit muff:  
Jetz ka-n-i madigs Fleisch verkaufe, und mit Uffbryys druff!»

«Für d'Metzger kennt's nit besser syy  
Jetz laufft dr s'Flaisch grad hindedryy....»

**Wotsch au by uns bänggle?**  
**Uff [www.vsg-basel.ch](http://www.vsg-basel.ch) erfahrsch meh!**

